



наведи телефон

Луимā СЭрипос

11.01.2024
№ 1 (1307)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



А. Алгадьева вәрүм хури

Ты хурит Татьяна Даниловна Самбиндалова Влад апге ёт пöслым öлөг.
Ты урыл 5 лöпсыт ловиньтэн.

Ты номерт ловиньтэн:

Няврамыт магсыл
яныг щäгт

▶ 3

Ёмщакв рүпитан
нэке

▶ 6

Äс маñщи нэ
хöтпа потре

▶ 8-9

«Ёмас» мирн
щäгт тоты

▶ 10

Пёс йис щирыл
тöрыл вэрнэ
маснут урыл

▶ 13

Щань лätңыл
эргын кäс öлыс

▶ 16



ТĀЛ



ТĀл котиль Этпос
(Январь)

ПН	1	8	15	22	29
ВТ	2	9	16	23	30
СР	3	10	17	24	31
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	

Рётың юсвой Этпос
(Февраль)

	5	12	19	26	
	6	13	20	27	
	7	14	21	28	
1	8	15	22	29	
2	9	16	23		
3	10	17	24		
4	11	18	25		

Мāньполь Этпос
(Март)

	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	
2	9	16	23	30	
3	10	17	24	31	

Яныгпōль Этпос
(Апрель)

ПН	1	8	15	22	29
ВТ	2	9	16	23	30
СР	3	10	17	24	
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	

Яңк нāтнэ Этпос
(Май)

	6	13	20	27	
	7	14	21	28	
1	8	15	22	29	
2	9	16	23	30	
3	10	17	24	31	
4	11	18	25		
5	12	19	26		

Лүйта Этпос
(Июнь)

	3	10	17	24	
	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	
2	9	16	23	30	

Ойттур Этпос
(Июль)

ПН	1	8	15	22	29
ВТ	2	9	16	23	30
СР	3	10	17	24	31
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	

Вōртур Этпос
(Август)

	5	12	19	26	
	6	13	20	27	
	7	14	21	28	
1	8	15	22	29	
2	9	16	23	30	
3	10	17	24	31	
4	11	18	25		

Сўқыр Этпос
(Сентябрь)

	2	9	16	23	30
	3	10	17	24	
	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	

Мāнь таквс Этпос
(Октябрь)

		7	14	21	28
ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	31
ПТ	4	11	18	25	
СБ	5	12	19	26	
ВС	6	13	20	27	

Яныг таквс Этпос
(Ноябрь)

	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	
2	9	16	23	30	
3	10	17	24		

Вāт сāграпнал Этпос
(Декабрь)

	2	9	16	23	30
	3	10	17	24	31
	4	11	18	25	
	5	12	19	26	
	6	13	20	27	
	7	14	21	28	
1	8	15	22	29	

Няврамыт магсыл яныг щәгт

Йильпи тәл ёхтын кастыл щәмьят тәнти коланылт хөвт тущтэгыт ос савсыр нётнэ, суртгын ёнгынутытыл тагатыяныл, ты няврамыт магсыл яныг щәгт ос ёмас ялпың хөтал, тән Йильпи тәл үрөгыт.

Округувт ват сәграпнал этпост Ханты-Мансийск үсн сав павлытныл ос ұсытныл няврамыт «Югорский Хөвтын» тотыглавет. Ты ялпың хөталн сав няврамың щәмьятныл агирищит ос пыгрищит, агмың-мосың, сакватахтам няврамыт, нусаг олнэ щәмьятныл няврамыт ос хотыют ёмщакв ханищтахты – тән пуссын «Югра-Классик» колн вөвыглавет, тот ёнгалтавет. Ты тәл Донецкий областьныл Макеевка ұсныл няврамаквет тотыглавёсыт, тән тот ёнгалтавёсыт, спектакль суссыт, щәил айтвёсыт ос кәтыл ёнгынут вәруңкве вөвыглавёсыт. Ты ёнгынутыт тән хөвтын тагатасаныл.

Овлэт Ащирма бйка ос Түйт агиқве няврамыт ёт тот ёнгасабйг, амщил амчисанән, няврамыт Йильпи тәл урыл стихыт ловиньтасыт, халанылт кассыт, нөх-патнэ няврамыт мән мүйлупсал майвёсыт.

Тот савсыр пүмыщ вәрыглавес, няврамыт кәтыл матыр хорам вәруңкве вөвавет, пөслэгыт, нэпак-лөмтыт эльмыл ханлэгыт, түйтсамыт нэпакыл яктэгыт, вильтаныл хорамың ольпыл сартавет. Тувыл кәтаныл акван-пувим хөвт мувлахи эргашлым ёмыгтасыт. Няврамыт оманылнәтянылн пуссын нётнэг маставет, төват хотты уйхулыг масхатэгыт, төват мультфильмытыл олнэ хөтпаг тәгылттахтэгыт.

Ащирма бйка ос Түйт аги ёт пөслахтэгыт, тәнанылн ты яныг щәгтыг олы.

Няврамыт ёнгалтавёсыт, та юи-пәлт яныг колнакын минасыт, тот спектаклил суссылтавёсыт. Кәсың тәл мөтсыр мөйтыл спектакль вәраве, тот артистыт татем ёмщакв ёнгёгыт, эргёгыт, ййквёгыт, аквтуп шар сөль та мөйтын тув та ёхтыгпасын. Артистыт няврамыт титыглыяныл, тән ювле потыртэгыт. Мөйт щёс арыгтем суссылтаве, агирищит-пыгрищит пүмщалахтым үнлэгыт, сунсэгыт, хүнтлэгыт. Ос юи-өвылт пуссын щәгтым кәтпатта рәтэгыт, щәгтэгыт, артистыт ёт пөслахтэгыт.

Мөлты тәл «Аленький цветочек» мөйт щирыл спектакль вәрыглавес. Артистыт маснутаныл сака нётнэг юнтым олсыт, хөн хум, пөяр, хөн агит, Мөңкв хурип пылыщмаңут ос мөт хөтпат маснутаныл шар сөль тащир вәрим олсыт. Тән нупыланыл сунсуңкве сака пүмщиг олы.



Няврамыт тамле пищмат хассыт



Няврамыт Ащирма бйкан ёнгалтавет

Тытәл «Лунная история» мөйт суссылтавес. Этпос савалап няврамаквет үргалы, тәнаныл нётянянэ. Акв порат тав вөрт хұлыстэ, хумус Аня агиқве кәстәл тыстувьялы, күняракве щәнәтәл хультыс кос ос тав өс, үрхаты, эрың хотыютын сәлилтаве. Этпос тав нупылэ

постуңкве патыс, хөт-әти мүйлым аквёет яласаңкве патсыг. Аня агиқве ащён нәл пәхвтуңкве ёмщакв ханищтавес, тав хум хөтпат халт касыс ос кәнащ пыг ёлымтастэ, аги нөх-патыс. Кәнащ пыг тав нупылэ аңкватәлыс, аги татем нётнэг олнэтэ, тав нэг вөвыстэ. Тамле ты ёмас мөйтыл няврамыт суссылтавёсыт.

Мөйт оигпам юи-пәлт няврамыт мощ ёнгасасыт. Юв миннэ элы-пәлт кәсың агирищкве ос пыгрищакве билет нэпак-лөмтэ сунсаве ос мүйлупса хусапсовыл миве. Тот атың канпёткат, шоколадыт ос ёнгынут пинавет, тән щәгтым юв та минэгыт.

Галина КОНДИНА

Тәл сыс вәрүм рупатаныл

Округ Думан пәриим депутаты 2023 тәл сыс 11 сапрәнин акван-атхатыгласыт. Ты махум мөлты тәлт хумус рупатасыт, та урыл округ Дума кўщай хум Борис Хохряков ляххал тотнә махумн потыртас.

Тав ләвыс:

– 2023 тәлт округув сәв олн сәлыс, мән хўрум щёс бюджетув сәвнүв олныл хансыгласүв. Юи-өвыл щёс мән вәт сәграпнал этпос 14 сапрәнит бюжентув урыл потыртасүв.

Хонтлан хөтпанув ос тән щёмьяныл нётмил тотнә магыс сәв нәпакыт ты тәлт пирмайтасүв. Тән ань сәвсыр пособие-ол-

ныл ойтает ос ўргалым өньщавет. «Югорский семейный капитал» на-маим олныт өс нөх-нётсанүв, тув лильпи ләтың хассүв. Няврамың щёмьят тәнки өлнә коланыл газ турпат хартнә магыс ты олныл ойтхатуңкве ань тах өс вөрмөгыт.

Няврамыт янмалтан махум магыс ос акв өмас нәпак пирмайтасүв,

ань щёмьят китыт манос хўрмит нявраманыл самын ке патыс, тән 177 сөтыра солкөвил тах ойтает. Ам номсэгум, няврамың щёмьят магыс ты олныт – өмас нётмил.

Предприниматель-хөтпат магыс өс эрнә нәпак хассүв. Тән ань сәвсыр кредит-олн виңкве вөрмөгыт ос нәлок-олн мощчанув ойтүңкве тах патэгыт.

Ос акв өмас тәла урыл Борис Хохряков ләтың ләвыс:

– Ты тәл мән Россия Президентувн пищма хассүв, Ханты-Мансийск

ўсув «Город трудовой доблести» нампа намыл вос миве. Владимир Путин Указ-нәпак хансыс, мөлты тәлныл Ханты-Мансийск ўс ань тамле нам өньщи.

Ос акв пищма Михаил Мурашко, мир пусмалтан Россия Министерство кўщайн хассүв, тәрвитың әгм өщнә махум тәрпил вос мивет ос олн ойттәл эрнә утыл өмашакв вос нётает.

Округ Думаныл
көтым ляххал
мәньщи ләтңыл

Людмила ТЕТКИНА
хансысәтә

Акв ялпың хөтал урыл

Югорский государственный университетт вәт сәграпнал этпост мөт хөн ләтың ханищтан әгит-пыгыт магыс акв пўмыщ урок өлыс. Таве английский, немецкий ос финский ләтың ханищтан нәг Марианна Юрьевна Семёновна ос Светлана Валентиновна Владимирова щөпитастән.

Та урокт финн махум хумус Рождество ос Йильпи тәл янытлэгыт, та өвылтыт потыртасыт ос вәти кина-охсат суссыт. Төнт финныт хўрум хөтал ўщлахтэгыт.

Тән пөс пораныл щирыл, вәт сәграпнал

этпост вәт нупыл нила хөталт этипәлаг юн пасан вәрөгыт ос католический Рождество янытлэгыт. Ты тәла өмшакв вәнә магыс Марианна Юрьевна финныт өлупсаныл урыл потыртас, тувыл әгит-пыгыт өт өс акв тамле пасан щөпитасыт. Тәнки атың нянь вәрсыт, лүптаң щай пәйтсыт ос исвещат пөламтасыт.

Мөн Людмила Гурьева өт өс тув вөвиньтәлвес-мөн, мөн Финляндиян ялум урыл потыртасмөн. Юи-өвылт ты махум өвылтыт мән китыглап вәрвес, әгит-пыгыт пус-сын мўсхалыг ювле-ләв-сыт.

Россия мәвт Рождество ялпың хөтал тәл котиле этпост сәтыт хөталәт янытлаве ос ты элы-пәл сәтыт махум Йильпи тәл ялпың хөтал мүйлэгыт.



ЮГУт ханищтахтын әгит-пыгыт өт пөслувөсу

Тамара МЕРОВА

www.khanty-yasang.ru

Савсыр тэлат вәрим хаництахтасыт

Округувт тамле ләтңыл намтым вәрмалы китынтыг блыс. Тув матыр тэлат вәнэ хөтпат мөт мэхум вөвияныл, тувыл аквэет хаництахтэгыт. Ты хаництап мәнлат мэхум эт рүпитан ос внешний связь департамент кол щёпиты, тән «Холод» нампа колт бс нётавет.

Обыл «Комунада» 2022 тәл оигпан элы-пәлт Сургут үст вәрыглавес, тув савсыр проектты щёпитан 16-35 тәл яныт мәнлат хөтпат атыгла-вёсыт ос тән хөт тэлатн хаництахтасыт.

Ювле хультум тәлт вәт сәграпнал этпост «Комунадан» сосса хөтпат ёхталасыт. Тув ань хөтпанкем сәвит мүй мэхум Ханты-Мансийкан вөвиньтәлвёсыт. Тән ат группа щирыл пёриявёсыт ос хаництавёсыт. Манырхурип колнакыт тот рүпитасыт, ань ты урыл акв-кит ләтың хансэв.

Кина пбслын колнак

Хаштәл ләтңыл ләвнэ нак, тыи хотьютыт ищхй-пың утанылт лөпс вәрёгыт ос матыр тэлат урыл потыр-охсат хансэгыт, мән кинат ос хурит суссылтэгыт. Ань ты вәрмалит мүй мэхманувн Екатерина Викторова суссылтас, тав сав мят яласан лёңханэ урыл пумыщ лөпс вәрыс.

Виктория колнакөт рүпитап хөтпат щёпт бщнэ телефонанылт бвлэт «этноблог» лөпс вәрсыт ос ищхйпың ут хосыт хумус сав мэхум тув вөвуңкв – хаництавёсыт.

Вбраян ос хул алыщлан вәрмалы

Тамле тэлат урыл Олег



Хаництахтам нэ

Виравев потыртас, тав тыи сыресыр вәрнутыт туризм эт хумус акван-артмёгыт, таи тәра-паттыс. Тувыл тән хумус бизнес хольт элалы то-туңкве рөвёгыт, Олег тәнанылн хултыс.

Нётнэ маснут юнтнэ нак

Тот Елена Николенко такви рүпататэ урыл ләтың лавыс. Ханты-Мансийскат «АМ» нампа маснут юнтнэ тэла вәр-вес, ань мүй мэхум тув то-тыглавёсыт ос тот сыресыр мәщтырлан накытн хаництавёсыт. Тувыл акван-нётхатым йильпи щирыл юнтэ супыт пбслысыт ос йинсыт.

Туризм тэлат

Тамле вәрмалит ём-щакв осн-паттын мәгыс Алена Евсютина потыртас.

Тав Нягань үст «Лафа» үщлахтын кол вәрыс, ань мэхум хумус та рүпатат олн сэлуңкве вөрмёгыт, таи хултыс. Ты колнакт Саранпавылныл бленэ нэ Любовь Филоненко хаництахтас, тав ань

лёңх щёпитасүв. Тав Ханты-Мансийск үсныл бовылтахты, тувыл Халь-үс, Саранпавыл, элалы Сүкырья павыл тәра Нёройка мус лёңхе блы.

Тот мэхум нёрың мәкве сунсэгыт, үщлахтэгыт ос акв та павлыт тәра ювле-минэгыт. Кәсың павылт тән тот бленэ сосса мирыт эт вайхатэгыт, музеитн щалтсэгыт, хотты потрыт хаснэ манос кәтыл хурит пбслын хөтпат эт вәщин-тахтэгыт тах.

Нёройкат мүй мэхум вит ёлалы сөсхатнэ мән ос яныг тур вәтан тотыглавет, эргыт эргим үщлахтэгыт, сосса мэхум пайтнэ тәнутыл тыттавет. «Туту.ру» намаим ищхй-пың лөпсыт щар ёр мят кинсым порат, Нёройка мә Россия янытыл 60 сәвит мстаг ловиньтаве. Тамле мят мэхум тәнки номтаныл тэлаг вөс ёмтсыт, пбикчим номт пинэгыт. Мән ань мэхум тув ялантан мәгыс ты лёңх вәруңкве номсасүв.

«Комунада» хаництан вәрмалы акваг элалы вөс тотаве, тох акван-атхатыгланэныл порат ос акван-нётхатым вәрнэ тэлат пуссын мұсхалыг ос пұмщиг вәравет.

Эргын тэлат

Тувыл тот атыт колнакыт эргыт ос эрыгсовыт хаництан накыт вәрыглавёсыт. Тамле тэлан мэхум Вера Кондратьева хаництасанэ. Маныр пумыщ тот блыс, бс элалы тах хансэв.

Тамара МЕРОВА

Ёмщакв рўпитан НЭКВЕ

Ань ты йист ул кәсың хөтпа матыр техника Өныщи. Кос хоты яласан ут бензин ман солярка тәл рўпитаңкв ат паты. Кәсың матыр яласан ёр Өщнә хөтпа таквинатән бензин ман солярка акваг ёвты.

Хулүмсүнт пәвилт заправкат рўпитан Эква Татьяна Даниловна Самбиндалова пәвлың мәхмытн пуссын вәве. Рўпат пәвилт кўщаянән Өс акваг Эсгаве, янытлаве, ёмщакв рўпитанЭтә мәгыс Хәльүс үскант Доска почётын хуритә ханлым Өлы.

Татьяна Даниловна такви урётыл тох потыртас:

– Ам Няхщамвөль пәвилт самын патсум, мәнй порат Яныгпәвилт Өлсум, тувыл акв тәл Няхлаңпәвилт Өлсум, Кульпаст ханищтахтасум, щәңюм тув хум вәрыс, ам тот Өлуңкв ат тахмаясум, Галя рўтум пәлт Өлуңкв воратасум. Школа әстланэм мус Няхщамвөль пәвилт интернатт ханищтахтасум, каникулт акваг Галя Өнигкем пәлт ялантасум, лов тәл яныт пәсыл тав палтылэ Өлсум.

Школа әстламум юипәлт пирикаскаг ханищтахтасум. Рўпитаңкв патсум: Өвләт Хәльүсыт хөпсы-әгм пөльницат санитаркаг тәл арыг рўпитасум, тувыл Рыпкооп ләпкат кит тәл пирикаскаг Өлсум. Тувыл ювле Хулүмсүнтын ёхтысум, тыт ЛПУ организациян рўпитаңкв патхатасум, 34 тәл тот рўпитасум: Өвләт китахкем тәл тәнәколт рўпитасум, тувыл связистыг вуйвәсум ос пенсиян миннә мус тот

та рўпитасум.

Пенсиян минасум, юн мощ Өлсум, үщлахтасум, акваг нас Өлуңкв марщумлавәсум ос АЗС операторыг патхатасум, ань тыт нилыт тәлум рўпитәгум. Хунь Өвилт тыг патхатасум рўпитаңкв – такем тәрвитаң Өлыс, сәв рўпата вәруңкв Эрыс. Бензин сөсантан курщип пөх мәтә мовалә лап-мәтым Өлыс, ам түйт няртнә мәнтыл та мәсов әхвтас пәртә мус янытәтыл хот-лоңхитаслум, әхвтас колкан самын-нәлттаслум. Хунь ань та мәсов хот-лоңхитамум порат, Марина Эщум ам палтум ёхтыс, тав Өс тыт ляпат рўпиты, ләви: «Наң ты манарын таяныт вәгыл хәхыртәгын, вертолёт кургын ат суйты?»

Ам ләвәгум: «Ам бетонка щиститәгум». Колонкат сака пёсыт Өлсыт. Ам кўщай пәлт свонитасум, ләвсум: «Колонкат хотпәнтуңкв Эрәгыт, счәтчикыт такем лйөльсаң рўпитәгыт».

Кәсыңьёмт кит-хүрум литра, товёрт лов литра арыг сөсыгпахты. Хотьют вәщкат – арыг литра ке сөсхаты, ләви, ойтхаты. Йтипәлаг ловиньтаңкв патәйн - бензин ат төвилхаты. Амки олнанум тув акваг нётуңкв Эрыс. Тона та әгирищит акваг пәнтхатсыт, хоса ат рўпитасыт.

Ам ләвсум: «Элалы



Т.Д. Самбиндалова хөвт пөхат лйөляхблы

тыщир ке паты, ам хотпатхатәгум». Тувыл сөль, тәлы мөт колонкат тотвёсыт, туй хот-пәнтвёсыт.

– **Манах колонка Өныщәгын? Солярка Өс тыналәгын?**

– Солярка әти, солярка мәгыс янас колонка вәруңкв Эри. Кит бензин колонка, аквтыщәс ты холыгпәг, мәхум акваг яласәгыт: сака сәв турист яласы, Мәнйясүнт нупыл минәгыт; төват Саранпәвилт нупыл минәгыт, тувле тай сәвыңпәлэ хүл пувнә мәхум сүлттәгыт. Ты тәл сәв командировочный мәшин ёхты, ань газопровод турыт хотпәнтавет, таймәгыс мәхум акваг яласәгыт. Туй яныг вит порат Өс сәв мәхум яласәгыт, бензин мәгыс акваг ёхтәгыт.

– **Бензин хунь хотыл тотаве?**

– Ягримныл тәлы ләх хосыт тотаве. Анумн тыт ёмас рўпитаңкв, кўщаянум ёмасыт, ёмщакв потыртәгыт, неланыл нөх ат сытыглыяныл. Ам тыт

акваг нювсәгум: тәлы түйт амки няртәгум, туй сәй әлмәве – бетонка сәе хот-хосгилум, таквсы лүптат ёл-вөтавет – лүптат хосгәгум, әтиңк хотьют хосха щар пармапты ман щәранкйив вущкасы – уля ул вос пәламлы, тамле мәт пилыщмаң.

Тамле ты потыр Татьяна Даниловна ёт мән потыртасмән. Ты яныг хөтпа, тавән юн үнлуңкв марщум, кәсың хөтал такви рўпататә коны-пал, кўм ёмты, тасәвит рўпата та вәри, тав рўпитан колхусапе пөх акваг сыстамыг үритә. Ань ты хөталытт ёмщакв рўпитанЭтә мәгыс Татьяна Даниловна Хәльүсн янытлаңкв вөввес.

Ты ёмас, кәркам хөтпа Элалы Өс аквтох вос рўпиты, сәв тәл пүстәгыл вос Өлы, Нәй-Өтыранән вос үргалаве.

Анна АЛГАДЬЕВА


www.khanty-yasang.ru

Ййкванув акван ул вос тэлыгтавет

Россия мāv яныг ўст Москват тынакт яныг суссылтап ъвылтавет, тув ань сāv пāлыл мāхум ёхталэгыт, тāнти ълнэ мāныл урыл потыртэгыт. Хотыют хумус ълы, маныр вāри ос тāнти культураныл хумус Элалы тотыяныл, ты мāгсыл акван-атхатыглэгыт ос халанылт ёмас вāрмалит урыл потыртэгыт.



Н.Б. Костылева



Нэг ййквыт урыл потыртэг

Яныг таквс этпос 16-19 хѳталыт сус ййквнэ ос эргын мāхум тув акван-атхатыгласыт ос тāнти мираныл пёс йис эргыт, ййквыт урыл потыртасыт.

Ханищтапаныл тох на-маявес – «Танцевально-песенный фольклор коренных малочисленных народов Севера, Сибири и Дальнего Востока: актуальные вопросы сохранения и развития». Надежда Костылева Югорск ўс музейт рўпиты, тав Москван та ханищтапын ялыс ос тот мāхум ёт рўпитас. Та тэланыл мāкыг тащир ълыс: пёс йис тāгыл эргын эргыт, ййквнэ ййквыт мѳтширыл ул вос вāравет, акван ул вос тэлыгтавет.

Щар яныг тārвитыг ань таи ълы, щāнь лāтың вāнэ хѳтпа мощцаг ёмты, мāнылат мāхум тāнти лātңаныл ат вāганыл ос эргыт ёмас щирыл эргуңкве ат вёрмяныл, лātңыт мѳт щирыл лāvияныл, таи ты лѳль. Щāнь лāтың ат вāнэ паттат ань мѳйтыт, пёс потрыт, эргыт хот та ёрувлахтэгыт, тāнаныл ань нэпакн хансуңкве эри, сакати нэпак тармыл вос хулытэгыт. Хуньт тах нѳх яныгман нйврамыт тот ловиньтыяныл ос тāнти лātңаныл ханищ-

таңкве тахмаёгыт.

Лүймāt ълнэ мирыт пуссын тāнти щирыл ййквёгыт, эргёгыт, тох тāн тāнти нйвраманыл ханищтыяныл. Ты порат сака мощца эргыт хулыт-сыт, пёс мāхманув тыгыл сāv эрыг вāсыт, мāщтырыг ййквсыт.

Надежда Борисовна мāн округувт эргыт ос ййквыт ханищтан хѳтпат урыл тот потыртас. Югорск ўс музейт мāныщи сāңквылтапыт, ханты нарсьухыт ълэгыт. 1990 тāлыт порат сāңквылтан вār-мальщар āлаты хот-ёрувлас, музейт нас сунсыглан пормасыг ѡщвес. Тувыл матъёмас тамле хѳтпат мāн округувн ёхтысыт ос эрганув, ййкванув

яныг мāхмытыл ханищтаңкве патсаныл, тувыл нйврамыт ты мўтран ханищтэгыт. Ань тахолыт тасавит мāнылат āгит-пыгыт сāңквылтапыл сāңквылтэгыт, эргыт эргуңкве, ййквуңкве хāсэгыт.

Ань ты порат Хāльўс район Саранпāвылт школа искусств рўпиты, таве хуньт Дмитрий Георгиевич Агеев пўнсыстэ, тот нйврамыт сака ёмщакв, мāк мāныщи щирыл ханищтавет.

Югорск ўст нйврамыт ханищтан школа искусств колн сāv āгирищит, пыгрищит ёхталэгыт, тāн тот сымыңыщ ханищтахтэгыт. Мāныщи нэт Екатерина Могуш, Людмила Волкова (Вынгилева) ос Дарья

Белова (Анемгурова) сāңквылтапыл сāңквылтаңкве, мāныщи ййквыт ййквуңкве, эргуңкве ханищтахтасыт, ань сака ёмщакв хāсэгыт ос мѳт мāхум ханищтэгыт. Ханты-Мансийск ўст округ творчество колт рўпитан хѳтпат нйврамыт ос кāсашан яныг хѳтпат ѡс сāңкылтаңкве ханищтыяныл. Тот Алексей Рещиков сāңквылтапыл сāңквылтаңкве сака ёмщакв хāсы.

Надежда Костылева такви анёкватэ Татьяна Сергеевна Кондина «Ём вошьты як» (мāныщи щирыл «Ля́м вātнэ ййкв») пёс порат ййквыглам ййкве ты семинарт суссылтастэ, потыртас, хумус таве мāк эрнэ щирыл ййквес. Татьяна Сергеевна 1919 тāлт самын патум эква ѡлыс.

Ты ханищтапт суссылтым ййквыт ос эргим эргыт урыл нэпак тах тārатаве. Тот нйврамыт ханищтан мāгсыл кāсың ййкв ёмщакв суссылтан щирыл хансаве. Мāхум тув сунсым тах ѡс ханищтахтуңкве вёрмёгыт.



Ханищтапн атхатыглам мāхум

Надежда Костылева
тётум потыр
Галина КОНДИНА
мāныщи лātңыл
толмашластэ

Ас маныщи нэ хөтпа потре

Клавдия Ксенофоновна Шадрина – Ас маныщи хөтпа. Тав ювле хульгум этпост Ханты-Мансийск үсн ёхталас. Төнт «Товары земли Югорской» яныг тыналахтын нак вәрыглавес. Маныщи нэ такви сагум пәссанэ, носкиянэ, шулкинанэ тот тыналасанэ.

Нэкве сака потрың. Тав такви өлупсатэ урыл, ляпа рүтанэ урыл потыртас. Ас маныщит потыртанэныл порат төва ләтңыт мөт щирыл ләвияныл. Клавдия Ксенофопонова хумус потыртас, ань та щирыл ләтңанэ хансыянүв. Тав потре ань элаль ловиньтэлың.

– Ам Силька Клава. Яныг үсн амти пормасанум тыналаңкв ёхтысум. Юн үнлантаңкве марщум, нарми тәл (тәла тәл) үнлантаым утшамыг (оссамыг) ёмтуңкв рөви.

Юи-өвыл тәлытт ам хансаң вай, пәсса тыянтәгум (сагегум). Пун ёвтсум, Нярихумит пәвылныл өс тәтвәсум, пун шинькайтаслум (ёмащакв щёпитаслум). Мәнә агирищакве самын патыс, тавән хансаң вай сагсум. Тав яныгмаңкв патыс, өста сагыслум.

Өвләт мощ тәрвитуң бөлыс, хансат ёмащакв ат тәлсыт. Тит оспа сәтапыл сагсум. Хүрум сәтапыл әрталасум, ань тай хәсәгум. Ты яныг үсн пормасанум тотсанум, мощ тыналасанум.

– **Омагн-әтягн хотыл бөлыс.**

– Аңкум (омам) Комудваны пәвылт самын патыс. Нама Елена Николаевна Шадрина (Савина) бөлыс. Ащум Ксенофонт

Филиппович – Посалтыт пәвылт. Тав сәв рүпитас, хул алыщлас. Аквмат порат сака пөльтахтас, хотталы щалтыс. Мән хүрум няврам аңкув (омам) ёт хультсүв. Төнт ам 5 тәлум төвлыс, ягпыгум хүрум тәлэ. Ащув юи-пәлт этпос ювле хультыс, мәнә ащув самын патыс, тав ащув туп хури щирыл вәстэ.

Төнт мән Нярихумит пәвылт өлсүв. Аңкув (омам) тит поснэ мис, сурты (мәнә мис), оши (пәля), титах-хүрмах лув бһыщис. Мән тавән акваг нётсүв, мискол сыстамтасүв, мис поссүв. Ётыл мән Тәк пәвылн вәнтлысүв, тот пёрма бөлыс. Тот мощ өлсүв, сака ёмас пора төнт бөлыс. Ты нампа пәвыл Октябрьский районт Чемаши, Комудваны, Перегребный пәвыл ляпат үнлыс.

Та порат яныгмам няврамыт рүпатаныл ат пилсыт, манти яныг хөтпат нупыл сунсым рүпитасүв. Нэмхотьюнт ат ханищтавесүв, маныр кәсалэв, таи та вәрөв.

Аквмат порат ам пёрна-аңкум (пёрнаң щанюм) ёт могах вәтуңкв миначум. Тав нупылэ сунсәгум, аквам пил та тәг, та тәг. Ам өс могах тәңкв патсум, тувыл сөргум та илямтавес. Пёрна-аңкум аңум төнт ушта суссылтас, тав пил лүптат тох



К.К. Шадрина такви сагум пормасанэ тыналасанэ

хот-висанэ, пилыт сыс-тамтас.

Тәлы порат пәвыл няврамыт өс акваг-атхатэв, тахсуңкв та минэв. Төнт май төрсун атим бөлыс. Мән вәңын сун выгүв, тув үнтэв, ёл та нуйхатэв. Вит өс ты суныл хартсүв. Маныщи ләтңыл халувт потыртасүв, руц ләтңыл шар ат хәссүв.

– **Ханищтахтын поран урыл потыртән.**

– Ам сәт тәлум төвлыс, няврамыт пуссын акваг-атвесүв, ләввесүв – Кеватнёл (Перегребный) пәвылн ханищтахтуңкв тотавөв. Ам маныщи маснудыт мастувөсум – суп, хансаң вай, русың төр. ТБС-ка нампа катерыл тув та тотвесүв. Маснуданув хот-вуйвөсыт, руц маснудыт майвесүв. Аңкум (омам) маснуданум висанэ ман ати, аты вәглум. Номилум, пәтинкал майвесүв, тән татем

сурумыг өлсөг, тыи шар люль ләгыл маснут бөлыс.

Мәнав руц нэ ханищтастэ. Өвләт нулевой классыт үнлысүв, тувыл уц бөвыл классыт ханищтахтасүв. Нилыт классыт Алы Нярихумит пәвылт ханищтавесүв. Күщаиг тот Нина Петровна Яркина бөлыс. Ханищтан нэв – Нина Иосифовна Куликова. Тувыл тот школа лап-пантвес, интернат вәрвөс. Мән ос Лүй Нярихумит элаль ханищтахтасүв.

1972 тәлт ам нөлөлов класс әстламум юи-пәлт Наталья Яркина юртагим ёт Ханты-Мансийск үсн педучилищан ханищтахтуңкве миначамән. Акв хөтал яныг үс мус тотвөсамән, төнт «трамвайчик» нампа мәнә катерыт яласасыт.

Хүрум тәл ханищтахтасум, нилыт курсыт ағмыңыг ёмтсум. Тюмень

Үсн пусмалтахтуңкв тётвёсум. Акв тәл минас, ювле ханищтахтуңкв ёхтысум. Тонт ос практикам Өвылтахтас. Ам Кевавт-нёл пәвылн минасум.

Титыт класс ханищтан нэг Нина Петровна Требуховская рүпитас, тав әнумн ты нётыс. Ам «мандалина» сәңквылтан утыл ёт-майвёсум, та утыл сәңквылтаңкве нъяврамыт ханищтасанум.

Ханищтахтуңкв хунь әстлысум, ам Сергино пәвылн рүпитаңкв тётвёсум, та порат тот йильпи школа рүпитаңкв Өвылтахтас. Аңкум (омам) ёт тув ёхтысамён, мёнамён школа кұчай лялт хонтыстә. Өлнә колыл тәра майвёсум, акв пәлэт завуч Өлыс, мот пәлэт ос ам аңкум (омам) ёт Өлсум.

Тонт колыт кұрыл пәлтыглавёсыт. Нәивыл тотвёсүв. Нәив-охсатта яныг-капаит, осыңыт. Мотыт хотал хум ёхтыс, нәиван-мён пуссын халтала-санә. Акв әтпостем рүпитасум, Өста Тюмень үсн пусмалтахтуңкв минасум. Та юи-пәлт Шеркалы



К.К. Шадрина ляпа рүтанә ёт



К.К. Шадрина, Я.Н. Тарлин ос А.И. Маремьянин

пәвылн рүпитаңкв тётвёсум. Тот ос пионер-вожатыиг паттувёсум.

Та юи-пәлт Ленинград үсн ханищтахтуңкв минасум, нила тәл тот Өлсум, Өвыл класс нъяврамыт ханищтан нэг ёмтсум. Тот Өлмув порат мән, мәнщи әгит, халувт сака юртыңыщ Өлсүв. «Северное сияние» ййквнә колн ялсум. Галина Яптина (Иванюк) мәнщи эргыт сака нётнэг эргысанә.

Мәнав Дина Васильевна Герасимова, Матрена Панкратьевна Вахрушева ханищтастән. Москван Өс ялсүв, сака ёмас пора Өлыс.

– Хот рүпитасын?

– Ханищтахтуңкв әстламум юи-пәлт акв тәл Кульпаст рүпитасум, тувыл Полноват пәвылт тит тәл. 1987 тәлт Нягань үсн Өлмыгтасум, ляпа рүтанум пуссын тот Өлсыт.

Тот ам 4 школат рүпитасум, мән нъяврамыт ханищтасанум. 1991 тәлт төва классыт сака моща нъяврам ханищтахтас, классыт акван-түлвёсыт. Ам 5 школан рүпитаңкв вуйвёсум, та юи-пәлт 6 школат 2009 тәл мус ханищтан нэг рүпитасум, тувыл нъяврамыт щакв-щүңкв ханищтасанум. Ань юи-Өвыл тәлытт пүпколн ялантэгум, тот воскресный школа Өлы, нъяврамыт ёт сакныл сәвсыр хорамыт хартэв.

– Рүтанын хот Өлэгыт?

– Ам щар ляпа рүтанум – ам ягыгум Геннадий Ксенофонтович ос ягәгим – Светлана Ксенофонтова. Ягәгим Өс сәв тәл школат рүпитас, ань тит тәл пенсият Өлы. Ягы-

гум тит нъяврам Өнщи, Юлия әгитә «Роснефть» колт экологыг рүпиты. Виктор пыге ань хонтлын мән минас.

Мот рүтанув Костиныт, тән халанылт щар яныг-пәла хотпа – Варвара Тарасовна Бешкильцева. Халувт юртыңыщ Өлэв, акван-хонтхатыглэв, потыртэв. Костин рүтнын сәв хотпа Нягань үст Өлэгыт. Нъярихумит пәвылт Өс сәв рүтанув Өлэгыт, тув акваг ялантэгум.

Үст Өлэв, вөрн пил вәтуңкв Өс ялантэв. Ты тәл мён акв эква ёт ворт хоттыпсумён, МЧС мёнамён тинсыс. Матьёмас ам телефонум тонт иң рүпитас, ам «геопозиция» рүтумн тётыслум. Тыкос ләввесамён акв мәт үнлуңкв, әтимас, мён элаль та минмыгтасмён. Акв-хуйплов щёс порат матьёмас та хонтвесамён.

Тамле ты пұмыщ потыр мәнщи нә Клавдия Ксенофонтова Шадрина потыртас. Ятил хотпакве пустәгыл вос Өлы, Нәй-Отыранән вос үргалаве.

Валентина
ХОЗУМОВА



Г.К. Шадрин ос М. Яркин

«Ёмас» мирн щәгт тоты

Ханты-Мансийск үст «Ёмас» нампа маснут юнтнэ организация ӧлы, тот Сергей Сергеевич Ставский тав пуңктоты. Хум «Югратур» хӧнтхатыглапт вәслум, потрамасмён. Китыгласлум, тәланыл манрыг мәнщи щирыл намтсаныл – «Ёмас». Сергей Сергеевич тох ләвыс:

– Мән маснут юнтэв
– нйврамыт, хум ос нэ хӧтпат мәгыс рёгың супохсат, агирищит ос нэт мәгыс супыт юнтэв. Хунь ущ рӯпитаңкве патсүв, номсахтасүв, вәрнутув хумус намтылүв. Тувыл мәнщи хӧтпат китыгласанүв, тәланыл мӯсхал щирыл миннэ порат хумус ләвёгыт? Тән ләвсыт: «Ёмас». Мән тән ётаныл кәсащасүв, тәлав «Ёмас» та намтыслүв.

«Ёмас» мирн та урыл ләви: мән ёмас мат ӧлэв, ёмас тәла вәрёв, ёмас маснут юнтэв, ёмас хурит пӧслэв. Олнэ мавт маныр вәрёв, мирн маныр суссылтэв, маныр урыл потыртэв – ты пуссын ёмас!

Маснут тәра мән лүи мә ӧвылтыт потыртэв, хуриянувт уйхулыт пӧслэв. Кәсың хури ёмащакв ханищтылүв, хӧт таве рӧви пӧслуңкве, хӧт ат таи. Пупапщи нэ маснутын ат вәрилүв, тамле хури ёт ёмыгтаңкве тәнанылн ат таи, туп хум хӧтпат вос ӧныщёгыт тамле маснут. Нэ супын мәңквля пӧслуңкве рӧви, ты мӯтраң товлыңуй. Нэ аращ палты, кол ўргалы, нйврамыт янмалты, таимәгыс мәңквля

нэ хӧтпа супын вәрилүв. Мәнщи хансат ос хорамыт маснутанувн ат пӧслэв, тәнаныл ёмащакв ат вәганув, кәсыңаныл мӯсхал щирыл ханищтаңкве эри. Мән вәглүв, ат те торгамтэгың, ул новхатэн, таимәгыс тув ат вуйхатэв.

Тӧва хӧтпа вольгың маснут ӧныщункве таңхи, тӧва ос нёмса, хурит нас хотты ййв манос хорамың лүпта вос ӧлыс. Тамле элумхӧлас мәгыс мән ӧс вәрёв маснут, хӧвт, пилыт ос лүптат пӧслэв. Акв хури этпостем щёпитылүв

– Маснутанын хӧт юнтыяның, тыналыяның?

– Тыт юн пӧслыянув, ам ётум маснут щёпитан дизайнерыт рӯпитэгыт, аквьёт номсахтэв, пӧслэв. Тувыл хуриянув Екатеринбург үст ӧлнэ фабрикан кётыянув, тот рӯпитан мәхум ёт потыртахтасүв, маснутанув нилыт тәл ты юнтыяныл. 42–54 размер яныт супыт ос супохсат вәрёв.

Пӧслум хуриянув щирыл маснут вәрнэ тәла тох ләваве: шелкография. Ты щирыл вәрум маснутув хуриянэ витыт поснэ порат хот ат патэгыт, ӧль-



С. Ставский

пыт хот ат хусыгпёгыт, тув тәкыщ ханэгыт. Тамле маснут хоса ӧныщункве патаве. Сунсән, тәлав намтыслүв «Ёмас», маснутыт ёмащакв, мӯсхал щирыл вәравет, элумхӧласын хоса ӧныщавет, сәв щәгт тәнанылн тотэгыт.

Маснутанув яңгыщ ищйпың ут хосыт тыналыянув, тот «Ёмас» нампа лӧпс ӧныщёв, та хосыт мәхум ёвтэгыт. Тӧванув Ханты-Мансийск үст Мәвит ос Элумхӧлас музей колнакт тыналыянув.

– Сергей Сергеевич, наң хотыл ӧлэгың?

– Ам Радужный үст самың патсум, тот яныгмасум. Школа асламум юи-пәлт Нижневартовск үст Академический институт прикладной энергетики колт ханищтахтасум. Тувыл Ханты-Мансийск үсн вәнтлысум, тыт Кванториум колт

нйврамыт ханищтым рӯпитэгум.

«Ёмас» тәла мән олн сәлнэ мәгыс хунь кос вәрилүв, ос мәк таи таңхёв – лүи мә мәхум танти мәнаныл вос янытлыяныл, тыгыл ӧлнэ хӧтпа хӧт-ати вос ханьщаве. Мән вәрнэ маснутанув хосыт нәңки, лүи мәхум ӧлнэ мәнаныл хумус эруптыяныл, янытлыяныл. Ань яңгыщ мәншат хӧтпат пӯмшалахтэгыт, рӯт мәхманыл ос руманыл мәгыс тамле маснут ёвтэгыт, мүйлуптэгыт. Тӧва хӧтпа тыт сәв тәл ӧлыс, тувыл мӧт мән вәнтлыс, тамле супыл ман супохсал тотаве, атхунь щәгты. Тот тавён эрнэ, тавён артмын уйхулыт ос лүптат-пилыт пӧслым ӧлэгыт, таимәгыс хӧтпа номтэ ёмас.

Светлана
РОМБАНДЕЕВА



Тав сәв тәл мәхум пусмалтас

Хальүст блнэ нэ Валентина Филипповна Савельева, такви бпарищ наме Отшамова, 30 арыгкем тәл мәхум пусмалтым рүпитас. Пенсиян хунь патхатас, ләккарыт общественный организациян хасхатас.

Ань мот хөтпанэ эт сәвсыр ялпың хөталыт, касылыт, суссылтапыт сәв тәл рүпитам ләккар мәхманэ мәгсыл щәпиты. Валентина Филипповна ты организация ос такви блупсатэ урыл тох потыртас.

– Ам Хальүс район Пугоры пәвылт самын патсум, Устрём пәвыл школат ханищтахтасум. Омагум-әтягум тонт сәлы үрим яласасыг, җтыл Тәк пәвылн олмыгтасыг.

Школа юи-пәлт ам Ханты-Мансийск үсн нэ хөтпат ләккарыг ханищтахтуңкве ми́на́сум. Мән группавт 45 элумхөлас блыс, туп 25 агит училище-кол әстласыт. Та пора акваг номылматы-глалылум, мән пуссын картопка хилуңкве, мот рүпата вәруңкве сәвсыр мән кетыглавесүв, сака емас, пүмаш пора блыс.

Ханищтуңкве әстласум, Юильск пәвылн ләккарыг рүпитаңкве кетвәсум. Тонт ты пәвыл Хальүс район нупыл хансым блыс. Тот киттәл рүпитасум, та пора сыс пүльницат 13 няврамытн самын патуңкве нәтсум.

Юильскыт блуңкве әнумн сака мұстыс кос, ос Хальүсныл та пәвыл мус товлыңхәп сәт хөтал сыс акв щәс туп тыламләлыс ос яласан ләңже кит щәс



В.Ф. Савельева ләккар-мәхманэ эт



В.Ф. Савельева

блыс. Тәрпи ос мот эрнэ пормасыт мәгсыл тыглетувле вәтихал яласасум, тох рүпитаңкве ат вәритасум, пөхын ми́на́сум.

Тәк пәвылн вәнтласум, няврамыт үргалан колт ләккарыг патхатасум. Җтыл Пугоры пәвылн ләккарыг вөввәсум, ты юи-пәлт 18 тәл Дәмино пәвылт мәхум пусмалтасум. Тувыл пүльницав лап-пантвес, ам рүпата тәл хулытсум. Тонт Хальүсн колтәгум эт вәнтласум, ос 2013 тәл пенсиян патхатнэм мус пүльницат тот рүпитасум.

Ойкаментыл хөт няврам янмалтасмән, ань ам 16 апыгрищ оныщәгум. Агиянум, пыганум пуссын Хальүст щәмьяң тагыл олэгыт.

Рүпатал пөхын хунь ми́на́сум, «Совет ветеранов-медиков» на́мпа организациян хасхатасум. Ань тув 100 арыгкем элумхөласыт ялантәгыт. Ам ос мот 7 хөтпат тән мәгсыланыл сәвсыр ялпың хөталыт, касылыт, суссылтапыт вәрыгләв. Ос Хальүст сәвсыр ялпың хөталытн эргуңкве, ййквуңкве вөвыглавөв.

Әнумн ты рүпата вәруңкве сака мұсты, ань юн шар ат үнләгум, акваг сәвсыр тәла оныщәгум.

Ам сәв тәл пүпколн ялантәгум ос мәхум эт Хальүс ляпат блнэ мән пәвылкетн ялантәв, тот нуса щәмьятн нәтәв, эрнэ пормасыл, тәнугыл тотыянүв. «Альянс» на́мпа колн вөвыглавем, тот яныгпәла хөтпат сагуңкве, юнсхатуңкве, сакныл хорамыт хартуңкве акваг-атхатыгләгыт. Ам мәщтырлаңкве хәсәгум, амки ханты суп ос мот пормасыт юнтәгум. Пыгагум ос вәпсанум вөраяңкве, хул алыщлаңкве пуссын ялантәгыт, тәнаныл сагиянум, вөрт яласым ләгланыл, кәтаныл ул вос пөлявет.

Амки нявраманум акваг нәтыянум, тән пуссын рүпитәгыт, ат ке алы-мәгыт, ам апыгрищанум школан, садикн хәйттыя-нум. Мәнавн, пенсият блнэ мәхумн, акваг нөвсуңкве эри, нас тох ке үнләв, тәра агмыл хартуңкве патәв.

Ам Хальүст 1999 тәл

пәсныл щәмьяң тагыл олэгум. Тыг хунь вәнтласүв, блнэ кол ат ошсүв, тонт нявраманум иң мәннит, мән пуссын аквагет 8 элумхөлас олсүв.

Тонт акв блнэ колыл мот колн вәнтләлсүв. Та порат сәвсыр очередин хасхатасүв, ойка́м 15 тәл ювле хулытум порат а́тимыг е́мтыс, нявраманум яныгмасыт, тәнки блнэ кол пуссын үнттысыт, ам ты мус блнэ кол үрәгум.

Ам «Ветхое аварийное жилье» на́мпа программан хосат хасвәсум, 10 тәл сыс акваг та ләвавем, блнэ колыл ань тах ты мивем, сәв тәл тох та үрхатәгум. Мән пыгумн колыл өвтвәсум, тәлы ащирмаң порат тув вәнтләлэгум.

Пәс колум пөхаттәпкан оныщәгум, картөпка ос мот тәнугт янмалтәгум, тох мощ нөвсәгум. Нявраманумн пувлынкөлыл үнттувәсум, ань туп лильпи кол үнттуңкве эри.

Людмила ТЕТКИНА

Ас я ватат яныгмасум



А. Зайцева

Катыл савсыр пормасыт вәрнэ нэ Анна Зайцева Югорск үст ӧлы. Ювле хульгум тал ойгпаме элы-палт Ханты-Мансийск үст «Югратур» нампа туристский форум ӧлыс, нэ тув катыл вәрнунанэ суссылтан магыс вӧвиньталвес. Ам Анна ӧт потрамасум, тэлатэ урыл китыгласлум, тав тох лавыс:

– Ам Югорск үсныл ӧхтысум, тот «Солнечные нити» нампа мастерской колнакт рупитӧгум. Няврамыт ӧт савсыр пормасыт катыл вәрнэв, лов талыг ты ӧмтыс. Ӑвлэт ам лүймә сосса мирыт маснут вӧрсум, ӧтыл руц пормасыт мащтырлаңкве патсум.

Ань ханты тучаңыт юнтӧгум, паквпалыл вӧриянум. Пӧс махманув хумус щаквщисыт, маснунанум-пормасытанум тох щӧпитыянум. Сӧтапытыл нэ шарфывт вӧрӧгум, тыгыл элалы тув манти хораманув сагуңкве номсӧгум. Аканит юнтӧв, ханты ос руц аканит, тӧн ӧтаныл агирищит сака ӧнгасӧгыт. Тӧнти вӧрӧгыт, юнтӧгыт, мастерской колнакт ӧнгасӧгыт, тӧва аканяныл юв тотыяныл.

Мӧлты порат ам ӧс акв пумыщ тӧла палт вуйхатасум – руц щирыл макраме лававе, сӧтапыл савсыр хорамың пормасыт сагӧгум. Ты тӧла няврамытн ӧс сака ӧруптаве.

– Анна, наң хӧт яныгмасын?

– Октябрьский павылт

самын патсум, Ас я ватат яныгмасум. Атям Владимир Георгиевич Еремеев ханты хум, тав Пальяново павылныл ӧлыс. Элнаң та мӧт туп сосса мир ӧлсыт. Омам руц нэ Татьяна Фӧдоровна Осинцева, махманэ Урал ӧрныл лүй мӧн ӧрвагыл кӧтвӧсыт.

Ам мӧнӧтагыл номилум, омам ос анӧквмакв акваг матыр мащтырласыг, юнсахатасыг. Хунь анӧквмакв палт ӧхталасум, тав ляпатӧн юнтӧгум, суссум, хумус щаквщи, тувыл тав ӧтӧ ӧс матыр юнтсум. Анӧквмакв сав апыгрищит ӧнщас, ос юнсахатан машинкӧтӧ туп анумн майластӧ. Лавсас:



А. Зайцева ос Т. Соловьӧва

«Наң, Нюрка, ӧлтӧнт ты тӧла акваг вӧруңкве патылын, ос няврамыт ӧт нянькалахтуңкве патӧгын». Сӧль тох и ӧмтыс, ань тыхӧтал мус катыл матыр-ӧти вӧрӧгум, юнтӧгум, агирищит ос пыгрищит ханищӧгум.

Яныгмамум порат анӧквмакв палт сав няврам ӧхталас, ам тӧн ӧтаныл акваг ӧнгасасум, ургаласанум, ань ос үст ӧлнэ мӧн махум ӧт матыр-ӧти вӧрӧгум.

– Тамле хӧнтхатыглапытн улпыл вӧтихал ялантӧгын?

– «Югратур» мӧн ань ӧвыл щӧс ты ӧхтысум.

Ханты-Мансийск үст тай ӧлсум, тыт «Мастер года» конкурс вӧрыглалаве. Тув пормасытанум мисанум, ань жюри хӧтпатн сунсыглавет, ӧмас щирыл вӧрсанум те, ӧрың акв хотты местал мивем, ӧтыл тах ущ тӧра-паты.

Югорск үс музейт рупитан хӧтпат савсыр ялпың хӧталыт вӧтихал вӧрыглӧгыт. Уринӧква хӧтал порат үс мир «Суеват пауль» музейн атхатыглӧлӧгыт. Ам тув кӧсың тал вӧвиньталавем, сыре-сыр ханищтапыт щӧпитӧгум, няврамыт ос яныгхӧтпат ӧт тот хӧтал палыт щаквщӧв, катыл матыр-ӧти мащтырлӧв, ӧнгасӧв. Тувыл ам тумраныл ӧнгасӧгум, ты тӧла ӧс амти ханищтаслум.

Мӧн үсувн ӧхталӧн, тот ӧлнэ музейн ос «Суеват пауль» мӧн ялӧн, «Солнечные нити» мастерской колувн щалтсӧн, катыл хотты пормас вӧрӧн. Мӧн кӧсың хӧтпан щӧгтӧв.

Светлана
РОМБАНДЕЕВА

Пёс йис щирыл тōрыл вāрнэ маснут урыл

Олеся Максимовна Идиятуллина, Лангепас үст «Руц кол» намба мāt кўщай нэг блы. Мён тав ётэ Ханты-Мансийск үст хōнтхатыгласмён ос тав вāрнэ тэләтэ урыл потыртасмён.

Ты тал Олеся Максимовна «Казачий кош» намба – проект ёт нōхпатыс ос грант губернатора олның премиял майвес. Тав рўпитан хōтпанэ ёт пёс йис блупса ханищтан программа щёпитас ос мāхум мāгыс суссылтап вāрыглас.

Олеся Идиятуллина «Доска почёта города Лангепаса» пāртыт наме хансым блы, тот та хōтпат наманыл хансавет, хотьют такви блнэ үсэ мāгыс сāv рўпата вāри, эрнэ тэланыл ёмашакв элалы тотыяныл, ты кас-тыл тән эсгавет.

– Олеся Максимовна наң хōт самын патсын, яныгмасын?

– Ам Алтай мāt самын патсум, хунь кит талум тōвлыс, щёмьявтыл Нижневартовск үсн вāнтылысүв, ащум тув рўпитаңкве кётвес, моц тот блсүв ос колтāглувтыл Лангепас пāvылн блуңкве миначсүв, та порат Лангепас пāvлыг блыс.

– Наң рўпатан хумыс хансым блы?

– Ам акв рўпатамт «фольклорно-этнографический ансамблит» кўщай хансым блэгум ос китыт – этнокультурный центр колт кўщайг рўпитэгум.

– Наң «Нефтяник» колт студият ос «Руц колт»

кўщай нэг ань блэгын, рўпатан урыл потыртэн.

– 2000 тал «Нефтяник» культура колт рўпитаңкве бвылтахтасум, тот «студия русского фольклора» намба колнакт кўщайг блэгум. Ос китыт рўпата бныңсегум, 2022 тал «Руц кол» пўссүв, тот ам кўщайг блэгум.

«Нефтяник» колт мāхманув ёт акваг матыр рўпата вāрсүв, сāvсыр янытлан намыт бныңсёв, кит тал сыс «Образцовый художественный коллектив» намыл майлувесүв.

– Мāхманын ёт матыр йильпи рўпата вāрегын?


– Пёс йис порат XVII нотыт, хунь Руц государстваныл блнэ мāхум Югра мāн ёхтысыт, та урыл «Казачий кош» намба мāt хōтал палыт потрамёв, ханищтахтэв, ты суссалтапув Лангепас үст рўпиты.

Лўпта этпос 2024 талт «Угорский торжок» фестиваль вāруңкве таңхёв, ты суссылтапт мāн тах потыртэв, хумыс руц хōтпат Югра мāн блуңкве ёхтысыт, хумыс сосса мирыт аквьёт блсыт, тāнанылныл вōруй совыт ёвтсыт.

Рўпитан мāхманум ёт пёс йис порат сосса мир хумыс блсыт, тыи ханищтэв, XVII нот порат мāнаныл сāv тāрвит бщсыт,



О.М. Идиятуллина мўйлын мāхум ёт пōслувес



ты урыл эрнэ нэпакыт а хōнтэв.

Молты тал яныг таквс этпост мāн исторический наука кандидат нэ Татьяна Александровна Молданова ёт хōнтхатыгласүв, тав āнум нэпаклбмт мис, тот хансым блы, манхурип нэпакыт ловиньтаңкве эри. 2024 тал бвыл этпост ты тэләт элалы ханищтахтункве номсэв ос маснутыт юн-тункве патэв.

Сāv вāнэ мāхум пёс йис накыт урыл китыгласанум, хумыс тōрыт ос хорамыт тыг тыналаңкве тотсыт, ты урыл нэм-

хотьют ювле лāvуңкве ат вёрми.

Югра – сосса мирыт блнэ мā, ты пёс йис накыт мāн ёмшакв вāңкве таңхёв, мāн пёс мāхманув аквписыг вōраясыт, сāv вōруй совыт руц хōтпатн тыналасыт.

Ханты ос мāнъщи мāхум ань ты йист блнэныл урыл нэпак тāратаңкве номсэгум, матыр блум вāрмалит няврамытн лāvуңкве, тән мāн сосса мирув ос руц блупса урыл вос вāганыл.

Оксана АЛБИНА

Эква-пыгрищ аквентыл олсыг. Мёңкв тэн палтэн акваг ёхталаңкве патыс. Тэнки хурахласыг Мёңквныл. Эква-пыгрищ номсы:

– Сар, мар вәруңкв?

Аквентыл номсахтасыг, номсахтасыг. Эква-пыгрищ ләви:

– Матыр мўтра вәримён, эрың пойты ялантаңкв.

Аквматэрт Мёңкв ты ёми.

– Эква-пыгрищ, ам наң палтын щай аюңкве ёхтэгум.

– Наң, ёхтэн, ёхтэн. Щай аюңкве, ёхтэн. Хунь ёхтэгың?

– Холытан тах ёхтэгум.

– Йиңкв патэгың, ам тара вос паттэгум – наң та ювын, щайпут унттэгум, наң кисувлэн.

Ёты хотал аквматэрт киснэтэ та суйты. Эква-пыгрищ аквентыл молянтахтым аращ палтсыг. Кит яныг ахвтасыг висыг, тортал исылтасагён. Тувыл ахвтасыг аращёныл мотнув ман поварттасагён. Исум вит щайпут пинсыг.

Ань Мёңкв ты нэгылыс.

– Яхум, унтэн, унтэн, ань щайпут унттэгум, щайом тах паялты. Щайпутэ ахвтас тармыл та унтыпавес.

Мёңкв унлы, сунсы, номсахты:

– Ос манрыг ахвтас тармыл щайпут унттыстэн, уля ат палтэг.

Аквматэрт щайпут та курувлас, мощ олыс, та паялтас.

– Наң хумус Эква-пыгрищ, щайпутн паялтас, улюв ат ёнщёгың, ахвтас тармыл?

– Ам мўтра хум, тох вёрмёгум.

Щар солъ, исум щайл пинвес. Мёңкв щай аис, та манарас. Аквматэрт та минас. Номсы:

– Ань сар юв ёхтэгум, ос тох арталахтэгум ахв-

Эква-пыгрищ ос Мёңкв (маньщи мойт)

тас тармыл щай пайтуңкв.

Юв ёхтыс, экватэ ну-пыл потырты:

– Эква-пыгрищ ахвтас тармыл щай пайтыс, ам ань ос тох щай пайтэгум. Кит яныг ахвтас та поварттас, щайпутэ полям витыл пиныстэ, ахвтас тармыл унттыстэ. Такос унлысыг, такос унлысыг, щайпутэн аты паялты.

Номсы:

– Аман хумус Эква-пыгрищ тащир вёрми. Холытан сар минэгум, тэн палтэн ялэгум.

Мот хотал ёмтыс, тэн палтэн ёхтыс:

– Ам щайпутум аты паялтас.

– Ам тай мўтра, вёрмёгум аквум алуңкв, мощ олэгум, нох-лылаяптылум.

Тав ат агты.

– Ати, хумус алылын ос нох-лылытын?

Эква-пыгрищ аквентыл хәрмис ошсыг. Ты элыпалт хәрмисэн алыстэн. Туре хот-яктыстэн, та турён келпыл тайнытастэн, китпал палылы нёгыстэн. Ты хәрмис турён Эква-пыгрищ акве суп ёлыпалн персаластэ.

– Наң тах унлэн, ам тах эртум алылум, турн яктапилум, келп сбсыпахты. Наң рагатэн, ронхен.

Мёңкв ты ёхты, та кисы,

ты юв. Унлысыт, манарасыт. Ань Эква-пыгрищ касай алмаястэ, акве та туре хот та яктапастэ. Акве та рагатас, та ронхи, лаглаге та санхви. Тувыл та пойтыс, келп та сбсхаты. Эква та рагатас, хуи.

Мёңкв сунсы, номсы:

– Солъ, акве та аластэ.

Унлысыг, матпалыт унлысыг.

– Наң ос лавсын, вёрмёгың аквын нох-лылаяпаңкв.

– Ань лылаяптылум.

Аквматэрт эртум сысыг ёхтыс, та пёнгыс, та манарас. Акве тыглетувле та повартталытэ, манаритэ. Акве аквматэрт нох та унтыс. Мёңкв такем та сунсы.

– Я-та-ты, Эква-пыгрищ танай хумус вёрми. Тортал мўтра хум олнэтэ. Ань тах юв минэгум, эквам ос тах алылум, ётыл нох-лылытылум. Ос тащирыл таве вәрыглылум.

Ань тай Мёңкв юв та минас. Юв ёхтыс, мощ олсыг. Матаре магсыл Мёңкв экватэ ёт хот-конт-малтахтасыг. Аквматэрт касай алмаяс, туре та яктапастэ, Мёңкв-эква та рагатас. Келп та сбсхаты, мощ унлыс, ёмыгтас. Номсы:

– Мощ олэгум, нох-



лылытылум.

Олыс, олыс, минас, экватэ такос хосгитэ, манаритэ, унттытэ, экватэ уса, сорумн патыс, та рагатас. Аластэ. Номсы: «Аман хумус тащир Эква-пыгрищ вёрми. Ам тай наскасыг эквам аласлум». Та лёнъщи. Мёңкв таккёт та хулытыс.

Аквмат порат тэлыиг ёмтыс.

– Наң, Эква-пыгрищ, такем молях ёсал яласёгың. Анумна хаништэлен ёсал яласаңкв. Анумн ёса вәрен.

Эква-пыгрищ ёсал вәрыстэ, вёртыпал щирыл котанэ пинсанэ. Минасыг, Эква-пыгрищ та тахамты, Мёңкве кос тахамты, ёсаге элалы ат лапёг сып ёлы-пална. Нох-минуңкве паты, ёсаге ёл-тахамтэг. Тав нох-воратас, Эква-пыгрищ сав щёс нох-хәңхиталы, сып ёлы-палн эла та тахамты.

Мёңкв номсы: «Ати, товлы, пойлтантахтэгум тав палтэ яласаңкве. Атиңк ам ётум матыр вәрыглы, такем мўтра олнэтэ».

Тувыл хотталы Мёңкв минас, Эква-пыгрищ аквентыл воссыг таве ат вәщиньтастэн.



Татьяна Семёновна
Тасманова мойтум мойт
нэпакн Людмила ТЕТКИНА
хансыстэ

Акв мāt, акв пāвилт кит нэг блэг. Акватэ – Мощнэ, мōтанэ – Порнэ. Мощнэ рот, тав сака мўтраң, сака ошмарың. Порнэ ошмар мощща бньши. Порнэ Мощнэ палт мōйтункве ялыгы. Акватэ, Мощнэ, элумхōлас нйврам бньши, мōтанэ, Порнэ, Ам̄ бри хансаң пыгрищ бньши.

Порнэ люль вәрмалъ вāрыс: тав Мощнэ нйврам пўщка кйвырн пиныстэ, пўщка лап-рātвес ос витн тāратавес. Мощнэ люньшим, тыстым блы. Пыгрищ тāl тох та хуль-тыс, таккētэ блы.

Хоса ман вāти тох бл-сбг. Аквмат я тапāлт мā-колрищ нэглыс. Тот хōтпа та блы. Ам̄ бри хансаң пыгрищ тувле вāтихал ялантāнкве патыс, тэнут тоты. Ам̄ бри хансаң пыгрищ щāнь палт ат блы, Мощнэ эт блы. Мощнэ таве китыглытэ:

– Наң кāсың хōтал ялэгын, хоталь ялэгын?

– Ам витн ялэгум. Тот эква ос бйка блэг, пыгрищ бньщег. Тав ам юртум блы. Тув ялантэгум.


Матахмат хōтал холан-тас, Мощнэ емас нйнь вāрыс, лāви:

– Юртын палт нйнь то-тэн, вос тэг!

Ам̄ бри хансаң пы-рищ я тапалн минас, та колрищ палт ёхтыс, Мощнэ пыгрище хōнтыс, емас нйнил тыттыстэ. Тав юртэ Мощнэ пыгётыл блыс. Ам̄ бри хансаң пыгрищ Мощнэ пыгрищ кос пувумтас, тав хот-ояс.

Холытан Ам̄ бри хан-саң пыгрищ Мощнэ эт я

Мощнэ ос Порнэ (мāньщи мōйт)



тапалн юртэ палт мина-сбг. Емас тāйм тавен тот-сбг. Мощнэ пыгрищ нōх-квāлапас, Ам̄ бри хансаң пыгрищ эт та ёнгасэг, та ёнгасэг. Тувыл тав лāви:

– Ам юв-минэгум. Мāколт āщум ос щāнюм тот ўрхатэг.

Порнэ пыгрищ, Ам̄ бри хансаң пыгрищ, лāви:

– Мощща бс ёнгимен!

Ты пора Мощнэ таве сыс палт пувумтастэ, вос-сыг ат тārтыстэ, юв-то-тыстэ. Пыгрищ та люньши, витн вораты. Мощнэ пы-рищиг эт аквёт блуңкве патсыт, емас кол ўнттысыт. Тав пыге алышлым ялы, емас алышлы, маныр эри, тай тоты. Тасāвит пормас тотыс.

Хоса ман вāти тох блсыт. Акв хōтал тав я тапāлн тыналахтуңкв минуңкве щёпитахтас. Ам̄ бри хансаң пыгрищ бс эт-минуңкве вораты. Эт-тотыстэ. Я тапāлн ёх-тысыг. Усың Отыр Ойка китыглы:

– Манырсыр ўс я та-

пāлт вāрим блы?

Пыгрищ лāви:

– Мощнэ ос Ам̄ бри хансаң пыгрищ тот блэг, тэн ўс вāрсбг.

Нэ ам̄ кон-нйвлыстэ, лāглыл сāңхвасастэ. Ты-налан бйка лāвыс:

– Ты ам ам̄пум, кон ул нйвлэлн!

Усың Отыр Ойка йиль-пииг потырты:

– Я тапāлт манхурип ўс олы?! Такем емас ўсыг ёмтыс, пуссын бньщегыт! Маныр кос бньщегыт, пуссын тот тыналасыт, шар йильпи вāрим пор-масыт!

– Та ўс – Ам̄ бри хан-саң пыгрищ ўс.

Пыгрищиг ювле ёхты-сбг, Мощнэн ты потыр урыл лāvсбг, Мощнэ Ам̄ бри хансаң пыгрищ нупыл лāви:

– Я тапāлн ялэн, тот сōрни лўпта халь блы, таве юв-тотэлн!

Ам̄ бри хансаң пы-рищ тув минас, халь палт

ёхтыс, халь алмаястэ. Юв ёхтыс, такви кол пōхат халь тўщтыгпастэ. Ущпыл щёлыңыг ёмтыс! Пормас манхурипа блы, пуссын ёвтэгыт.

Пыгрищиг бс я тапāлн минасбг. Ам̄ бри хансаң пыгрищ хумус щёлыңыг ёмтыс, потыртас. Усың Отыр Ойка лāви:

– Ам тапāлн минэгум, амки сунсэгум, хумус тән тот блэгыт.

Нэ таве ат тārтытэ. Ам̄ бри хансаң пыгрищ мōт мāн ялантас. Сака сāv лув ёвтыс, щёлыңыг ёмтыс, арыгкем щёлыңыг. Тав ўсэ янгыг ёмтыс.

Усың Отыр Ойка тапалн йильпииг воратāнкве па-тыс. Тав тув минас, ўсн ёхтыс. Усың Отыр Ойка лāви:

– Ам тыпāлн нэн тако-с ат тāратавёсум, тоха та минасум!

Усың Отыр Ойка Мощнэ палт блмыгтас, тэн нэгыг ос бйкаңыг ёмтсбг. Уст блнэ пыгрищ, Мощнэ пы-рищ, блы. Тән Порнэ кит лув палт нэгсыт, та маныг-тавес. Ам̄ бри хансаң пыгрищ тән ётаныл блуң-кве патыс. Тав такви ам̄ п сове хот-āңхвыстэ, такем емас бйкаг ёмтыс! Тав нас ам̄пыг яласас.

Тән ань та блэгыт, ань та шунегыт.

Ты мōйт 1951 талт Хальўс район Хорыңпāвилт блум нэ **Ульяна Михайловна Хозумова** мōйтыстэ, тав 33 тālэ тōвлыс.

Е.А. Кузакова мōйт нēпакн хансыстэ

Лүймә сәрипос
(Северная заря)
№ 1 (1307), 11.01.2024
Соучредители
Дума, Правительство
ХМАО – Югры
Издатель
Департамент внутренней
политики
ХМАО – Югры

Редакция
ВРИО главного редактора –
Рагимова Н.В.
Телефон (3467) 33-24-02
Заместитель главного редактора –
Кондина Г.Р.
Телефон (3467) 33-22-72
Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52
E-mail: gazeta@khanty-yasang.ru
Газета размещена на сайте
www.khanty-yasang.ru
Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399
Тираж 1710 экз.
Заказ 28
Цена свободная
Мнение авторов
публикаций не
обязательно отражает
точку зрения редакции.
Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.

Щань латңыл эргын кәс олыс

2023 тәл оигпан элы-пәлт Ханты-Мансийскат олнэ соссa мәхум «Югра-лылыёп» нампа колн акван-атыглавёсыт. Тот матумпәла соссa хөтпат нас акван-хөнтхатнэ мәгыс ос эргын кәс сунсуңкве вөвиньтәлвёсыт. Усыт ханты мәхум эргыт эргын «Ёмвош ёх» акв кол ос мәньщи эргыт эргын «Лүй сәм» мөт кол олэг. Тән ань мүй хөтпат элы-пәлт касыл вәрыгласыг.

Өвлэт ты группаг тәнки халэнт касуңкве номылматыгләлсыг, тувыл төваныл тув ёхта-лаңкве ат вөрмысыт. Төнт тән нас мүй мәхум элы-пәлт ханты ос мәньщи сәт эргыт эргысыт ос хоты хөтпа хөтыл олы, хөт рүпиты, китыглавёсыт.

Ты элы-пәлт акв хоть-ютаныл кәнтын түйтым нэпак-лөмт кон-хартыс. Ань «Ёмвош ёх» овылтас, тувыл группаг тәнки халанылт пентхатым эргуңкве патсыт. Ты колн онтолов ханты нэт ялантэгыт, ань акв нәнаныл тув ат ёхталас. Тән янгыш Хальүс район сәвсыг мән пәвлытныл олэгыт ос пуссын щань латңаныл вәгыт ман ханищтэгыт.

Овылт тән «Ван рутат» («Ляпа рүтыт») эрыг акваг эргыяныл. Таве ляххал тотнэ нэ Людмила Гурьева Мужы пәвылт Ямал мят Тамара Александровна Пырысеваныл хунтамластэ ос тыт элалы ханищтасаныл. Сәв ханты эргыт Валентина Елисеевна Швецова (Ерныхова) Касум пәвылныл вәг, ты коныпал такви эргыт вәри. Тав хосат пенсиян патхатас, усувт агияге ёт олы.

Белоярский үсныл Виктория Чернова, Анна Зверева Тугияны пәвылныл, Виктория Сызарова Ягрим пәвылныл ос Ираида Аксёнова Полноватныл олнэ нэт

эргыт ханищтым сыс щань латңаныл ёмщакв ханищтыяныл. Анна ос Виктория мәхум нётмил вәрнэ колт рүпитэг ос Ираида «Төрүм Маа» музейт». Полноват пә-вылныл Раиса Головина ос Фаина Иштимирова олэг. Раиса Васильевна сәв тәл мәхум пусмалтан колт рүпитас, ты тәлт пенсиян патхатас, Фаина Павловна сәв тәл соссa мирыт пёс накыт элалы тотыянэ. Ань тав ты ханты нэт акван-атсанэ ос эргын кол вәрыс.

«Лүй сәм» нампа мәньщи группаг хөт хөтпат акваг эргёгыт. Мөт хөтпат кәсашёгыт ке, мән тәнаныл ос үриянүв. Саранпәвылныл тув хүрум хөтпат эргуңкве ялантэгыт. Тувыл «Төрүм Маа» нампа музейт рүпитан нэ Неля Низамова (Ромбандеева), тав Лөпмус пәвылныл олы. Юлия



В. Чернова, Р. Головина, А. Зверева, Л. Гурьева, В. Швецова, В. Сызарова, И. Аксёнова, Ф. Иштимирова

Яркина Ванщеват пәвылт яныгмам нэ, ань «Хөтал» нампа Ас-угорский театрыт артистаг рүпиты. Пуңкотнэ нэг Светлана Астапович пәрияслүв, тав Октябрьский район Лүй Нярехумит пәвылныл олы. Тав ань «Лылың сөюм» нъяврамыт ханищтахтын центрыт рүпиты, мән та колт төванакт акван-хөнтхатыгләв.

Ань касылын Юлия ос Светлана ёхталаңкве ат вөрмысыг. Мән нила хөтпат «Ас вәтат лёлөгум», «Пил вәтнэ агит», «Куккук», «Нётнэлямйив», «Куренька», «Агит эрыг» ос «Сүма Мёсыг» эргыт эргысанүв. Касың эрыг

рущ толмашлан ләтың-охса ат ке ощсыт, ос хотьютн хасвёсыт, хоты пәвылт эргувёсыт – ты овылтыт акв-кит ләтың ләвсүв.

Та юи-пәлт кәс суснэ хөтпат тәнки номтаныл мәнавн ләвсыт. Алла Иштимирова-Посохова ты группаг ёт ёмщакв вәйхатуңкве хосат тәгыл таңхыс. Төваныл урыл ущты хунтамлас, хотьют хотяныгмас ос хоты щёмьяныл олы, таи пүмщалас. Аквтох ләвыс, төва эргыт акв янас хөтпан ке эргавет, ёмас олнүв. Соссa пёс мәхманув «хор» щирыл эргыт ат эргыгләлсыт.

Евдокия Андреевна Нёмысова ос Дина Васильевна Герасимова хот-щәгтым сымыл щань латңыл эргыт хунтлысыг. Тән мәньлатыг олмён поратхотты пәвыл клубыт ман хөт акван-хөнтхатнэ сыс акв тамле кәс вәрнүтыт суссыг. Таи ёмас, тамле нак ань иң элалы тотаве.

Владимир Куриков йильпи ёхтын тәл кастыл ёмас ләтың ләвыс ос нэ хөтпатн мәгың тәнүт ху-сап муйлуптас.



Акван-атхатам мәхум мүйлысыт

Тамара МЕРОВА